

Rau To Paulus Imbooda Ila To Yes Epesus Efesus—Ephesians

¹ You Paulus. Maaron ighur ghou nanim mbanjoona to Yesu Krisi itaghon tau lolo. Nambood rau tonene ilat to yam tamtoghon patabuana to Maaron to aneep izi ndug Epesus, ve aghur ila to Yesu Krisi, ve aneep tunja ila toni. *Mbanj 18:19+, Mbanj 19:1+, 20:17+*

² Poia to Tamaan Maaron ve Tiina toit Yesu Krisi iza tiam, ve tingin gham aneep pooli toman lolomim luuma. Onoon.

Krisi inim ataam pa poia to Maaron iza toit

³ Iit tapait Maaron, ye Tiina toit Yesu Krisi Tama. Pasa, iit to taneep tunja ila to Krisi, Maaron igham poian ghiit, ve igham mbeb popoiadi naol to ndug sambam pait, lesu ipalot anunuud.

⁴ Aghita. Iit to taneep tunja ila to Krisi, muun kat, sawa to Maaron ighur sambam ve taan sone, ye isia ghiit ighaze igham ghiit tanim le. Lesu leed sosor eta ila ye mata sob, ve tanim tamtoghon toni patabuana. *Ro 8:28+; 2Tes 2:13; 2Tim 1:9*

⁵ Tovenen muun kat, Maaron lolo ineep toit, ve mata ingal ighaze igham ghiit tanim ye ndinatu ila uraat to Yesu Krisi. Nene ye itaghon tau lolo ve poia toni. *Yo 1:12; Ga 4:5*

⁶ Maaron ighaze tamtoghon tipaiti pa poia toni. Tauto igham poian ghiit sorok itaghon tau lolo ve ngar toni, ve ighur poia toni tiina kat iza to iit to

taneep tunjia ila to Natu Yesu Krisi. Natu tonowen, Tama Maaron lolo pani kat. *Mt 3:17*

⁷ Poia to Maaron, nene tiina le tiina kat. Iit tamtoghon to taneep tunjia ila to Krisi, sinj toni ipas ghiit tavot pa samia tapiri, ve ireu sosor toit isob ilale. *Ro 3:24; Kol 1:14; Hib 9:12; 1Pe 1:18+*

⁸ Tovenen Maaron ighur poia toni tiina kat iza toit. Ve ye ipaghazonjan ghiit pa ngar popoia naol, leso taghazonj padi.

⁹⁻¹⁰ Ngar yongaanj toni to ineep ila tau lolo, tauto Maaron ipaghazonjan ghiit pani wa. Ngar tonowen injarua Yesu Krisi. Pasa, Maaron ighaze igham pooz pa mbeb tisob ila ila le ighaze sawa kat to ye tau ighuri ne ivot, ghoru ilup mbeb tisob to tineep izi sambam ve taan tinim ee moghon, ve ighur di tineep ila Krisi samba ve Krisi inim daba padi. *Ro 16:25+; Ep 3:9+; Kol 1:16+,26*

¹¹ Sawa isob, Maaron igham mbeb tisob tivotvot titaghon tau lolo ve ngar toni. Iit tamtoghon to taneep tunjia ila to Krisi, muunj kat, Maaron isia ghiit itaghon tau lolo ighaze igham ghiit tanim le. Tauto aazne, tagham mbeb popoiadi naol ila toni. *Ro 8:28+; 2Tim 1:9*

¹² Ve ye ighaze yei Yuda to nighur ila to Krisi muunj, nipatoonj tamtoghon pa tapiri ve poia toni, leso tipait iza.

¹³ Ve yam paam. Sawa to aloonj saveenj onoon to varu poia ve aghur ila, yamja Krisi alup gham anim ee moghon. Pasa, saveenj tonowen ipaghazonjan gham pa ataam to Maaron igham mulin gham ila uraat to Krisi. Ve Krisi ndamo payam, tauto Maaron igham Avuvu Patabuanj payam itaghon saveenj mbuaanj toni. Avuvu tonowen,

tauto inim ghilaloon payam ighaze yam tamtohton toni. *Yo 14:16+; Ga 3:14; Ep 4:30; Syg 7:3*

¹⁴Maaron Avuvu to taghami ne, nene inim pughu pa mbeb popoiadi naol to muri ye pale igham di pait. Leso taghur ila taghaze izaad pa ghamuun mbeb tonowen, ve tasaan sawa to ye igham mulin ghiit, ve igham ghiit tala taneep tomani izi ndug sambam. Tovenen iit tapait Maaron iza pa tapiri ve poia toni. *Ro 8:23; 2Kor 1:22*

Suñuun to Paulus

¹⁵You naloon varumim tighaze yam aghur ila kat to Tiina toit Yesu, ve lolomim pa Maaron tamtohton toni patabuanã tisob, ve aghamgham poian di. *1Tes 1:2+*

¹⁶⁻¹⁷Sawa tonenen ve inim, you napul suñuun payam maau. Sawa isob, matag ingalngal gham ila suñuun tiou. Tiina toit Yesu Krisi Tama Maaron, ye iza tiina pa tapiri ve poia toni. You lolog poia pani, ve napaiti pa uraat to ye ighamghami ila lolomim. Ve nanoknok ghasoniini naghaze tau Avuvu igham gham aghilaal ngar popoia, ve ipaghazonã gham pa Maaron ngar toni, lesa awatag katin Maaron. *Kol 1:9; 2Pe 1:3*

¹⁸Ve naghaze Maaron igham ghazonã toni isul ila lolomim, lesa aghilaal mbeb popoiadi naol naol to ye ighaze igham di pa tamtohton toni. Nene mbeb to aazne aghur matamim pani. Ye ipoi gham anim le, lesa agham mbeb tonowen. Onoon kat, iit Maaron tamtohton toni izaad pa ghamuun mbeb katindi to popoiadi kat. Tauto naghaze yam awatag katin di. *Mbanj 26:18; 2Kor 4:6*

19 Ve naghason Maaron naghaze igham gham aghilaal katin tapiri to iuluul iit tamtoghon to taghur ila toni. Tapiri tonowen, tiina le tiina kat. Ighaze tagham ngar pani, nene taraua maau. *Ep 3:16; Kol 1:29*

Aazne, Krisi ineep izi sambam ve inġin mbeb tisob

20 Maaron tapiri to aazne iuluul ghiit, nene raraate inimale tapiri to ipamundigin Krisi pa mateeġ, ve ighami iza ila sambam, ve mbole izi ila Tama Maaron nima waan. *2Kor 13:4; Kol 3:1; Hib 1:3+*

21 Tovenen aazne, Krisi ineep to sala we, ve ighamgham pooz pa mbeb tisob. Yes pooza ve daba to tinġinġin ndug, toman mbeb arianaġi to sambam ve taan to ledi tapiridi tintina, mbeb naol naol to ledi izadi, nene Krisi iza ve tapiri ilib padi kat, ve tisob tineep ila ye samba. To aazne, ve sawa muri paam. *Mt 28:18; Kol 1:16+; Pil 2:9+*

22-23 Pasa, Maaron ighur mbeb tisob tineep ila Krisi samba wa. Tauto ye inim daba padi ve ighamgham pooz padi. Ve pooz toni, nene pa iuul yes to tineep ila lupuuġ toni. Lupuuġ tonenen, nene inimale Krisi tau anoġa. Ve ye ineep ila lolodi ve ipavonin di pa tapiri ve poia toni le tivon kat, inimale ineep ila mbeb tisob lolodi, ve igham pooz padi. *Ro 12:5; 1Kor 12:27; Kol 2:10*

2

Maaron igham nepooġ paghu pait

1 Muuġ, yam aneep animale yes mateeġa. Pasa, lemim ngar eta pa Maaron maau, ve irau agham ngar poia eta maau. Sawa isob, yam amalaan pa

tutuun toni, ve agham ngar samsamia naol. *Kol 2:13.*

² Sawa tonenen, laghoon tiam, yam ataghon ngar to taan, ve alonloon Sadan aliya. Ye daba to avuvu samsamiadi to tinepneep izi sambam paronania, ve ipapazaagh tamtoghon leso tizoor Maaron aliya. *Yo 8:44; Ep 6:12; Kol 3:6+*

³ Ve yam moghon maau. Yei paam. Pasa, muun iit tasob rarateed. Sawa isob, lolood munjina ipapazaagh ghiit ve tagham ngar samsamia naol. Pasa, iit tamtoghon to taan gabuaad tovene. Tipoop ghiit toman ngar samia. Tauto muun, mbalmbali to Maaron ineep toit tanimale tamtoghon tisob to taan. *Mbo 51:5; Ro 1:18+; Tit 3:3*

⁴⁻⁵ Sawa tonenen, iit taneep tanimale yes ma-teenja. Leed ngar pa Maaron maau, ve irau tagham ngar poia eta maau. Sawa isob, tamamalaan pa Maaron tutuun toni. Eemoghon Maaron, ye poia pughu, ve lolo isamin ghiit kat. Ve lolo ineep toit kat ve ighaze igham poian ghiit. Tauto igham mulin ghiit itaghon tau lolo ve poia toni, ve ipamundigin ghiit toman Krisi ve tagham nepoon paghu ila toni. *Yo 3:16; Kol 2:12+; Tit 3:4+*

⁶ Ve aazne, nene inimale ye igham iit tamtoghon to taneep tunja ila to Krisi, ve itinja Krisi tazala ndug sambam ve taneep tomani ila ina to ghamuun pooz. *Kol 3:1+*

⁷ Ila uraat to Yesu Krisi, Maaron igham poian ghiit kat. Poia to ye ipatoonja pait, nene tiina le tiina kat. Pale taghuri iza to sa? Maau. Mbeb eta iraua maau. Ye igham tovene, leso ipatoon poia toni ivot ighazoon to aazne, ve sawa muri paam.

⁸ Tovenen yam to aghur ila to Krişi, Maaron igham mulin gham itagħon tau lolo ve poia toni. Mbeb tonenen ivot itagħon nġar poia eta to yam aghami ne maau. Maaron igham payam sorok. *Ro 3:24-28; Ga 2:16*

⁹ Tovenen ye igham poian gham itagħon nġar poia eta to yam aghami ne maau. Ye igham payam sorok. Leso tamtoġhon eta ipait tau sob.

¹⁰ Iit tamtoġhon to taneep tunġia ila to Krişi, tani-male mbeb to pagħunadi kat. Maaron tau ighur għiit, ve igham għiit tanim pagħu, lesu tagħam uraat popoia to ye tau ighur di pait patagħaan wa. *2Kor 5:17; Ep 4:24; Tit 2:14*

Krişi ilup yes Yuda ve yes to Yuda maau ne tinim ee mogħon

¹¹ Yam to Yuda maau ne, matamim ingal. Muuñ, yes Yuda tipapait taudi tighaze yes, għoro tizir di. Ve tiveveleg gham tighaze yam tizir gham maau. Eemogħon uraat to ziroon tamtoġhon, nene mbeb to uliid mogħon to tamtoġhon tigham pa nimadi. Nene igham mbeb eta pa lolood maau.

¹² Sawa tonenen, yam aneep saġuan pa Krişi, ve irau yamña Maaron tamtoġhon toni to Israel alup gham maau. Muuñ, Maaron yesña yes Israela timbua saveeñ pa tilup di tinim ee mogħon, ve ye imbua saveeñ popoia naol padi. Eemogħon yam lemim izamim pa saveeñ mbuaań tonowen maau. Pasa, yam siñ ite. Ve nepoonamim izi taan, yam aghilaal mbeb popoia to Maaron ighaze igham di pait ne maau. Pasa, sawa tonenen, yam awatagi maau. *Ro 9:4*

¹³ Eemogħon aazne, yam anim Krişi le ve aneep tunġia ila toni. Tovenen yam tamtoġhon to muuñ

aneep sagan pa Maaron, Kriſi ſiſj toni inim ataam payam ve anim agharau Maaron wa. *Ro 5:2; Kol 1:20; Hib 12:23*

¹⁴ Tovenen Kriſi tau to inim pughu pa luuma to Maaron inim pait, ve igham ghiit itiſja Maaron talup ghiit tanim ee moghon. Aghita. Muuſj, koi ineep ila Yuda ve yes to Yuda maau ne sosodi inim didiſj padi ve ipoon di, le irau tilup di maau.*

Eemoghon sawa to Kriſi imbaad yabyabuſj ve imaat, ye ireu didiſj tonowen izi, ve ilup di tinim ee moghon. *Ro 5:1; Ga 3:28; Kol 1:20+*

¹⁵⁻¹⁶ Muuſj, tutuuſj ve saveeſj ſgalsekiſj naol to Mose isavia di, nene igham Yuda ve yes to Yuda maau ne tiwaghurun koi pa taudi, ve tineep sagan sagan. Eemoghon sawa to Kriſi igham yabyabuſj ila tini ve imaat izala ai pambarooſj, ye ipasob tutuuſj toman ſgalsekiſj naol tonowen, Tauto igham ſgar luuma ivot, ve ilup yes to tineep tuſja ila toni tinim lupuuſj ee moghon. Pasa, sawa to imaat izala ai pambarooſj, ye irab motin koi to ineep ila itiſja Maaron sosood, ve ilup ghiit toman Maaron tanim ee moghon. Tauto ipasob koi to muuſj ineep ila Yuda ve yes to Yuda maau ne sosodi paam, ve ilup di tinim lupuuſj ee moghon.

Kol 2:14

¹⁷ Ve ye inim ivotia saveeſj luuma pait ighaze: “Aneep toman lolomim luuma. Pasa, koi ineep

* **2:14:** Tutuuſj naol to Mose isaav tovene: Yes Israela irau tineep sagan pa yes to Yuda maau (Ughita Igham 23:24,32-33, 34:12-16). Ve muuſj, didiſj tiina eez iluvut Rumai Tiina. Didiſj tonowen, timbood paesiſj katindi ineep ila. Isaav tovene: “Ighaze tamtoghon eta to Yuda maau, imalaan pa didiſj tonene ve ilooſj ila, ye pale imaat.”

ila yamŋa Maaron sosomim muul maau.” Saveen tonene ilat pa yam tamtoghon to muun aneep sagan pa Maaron, ve inarua yei Yuda to nineep nigharui ne paam. *Is 57:19; Lu 2:14; Mbanj 10:36*
 18 Pasa, Kisi to inim ataam pa Avuvu ee moghon ilup ghiit tasob, ve Avuvu tonowen iuluul ghiit pa tala tagharau Tamaan Maaron, leso itija tasavsaav. Yam to Yuda maau ne, ve yei Yuda paam. *Ro 5:2; Ep 3:12; Hib 10:19+; 1Pe 3:18*

19 Tovenen aazne, yam anim loomba, ma sum-budi muul maau. Yam anim tamtoghon to Maaron, ve yamŋa tamtoghon toni patabuana asob to sambam. *Pil 3:20; Hib 12:22+*

20 Yam animale rumai to Maaron malimoona pida. Rumai tonowen, Maaron ireii iyon izala yes mbanjoona to Kisi ve yes propeta uraat todi. Ve Yesu Kisi, ye yaam to inim pughu pa rumai ve ipaloti.

21 Ye ikis rumai toni malimoona tisob tineep tunja ila inadi, ve ighamgham uraat pa rein rumai toni, leso iza inim tiina, ve inim Ngeu Tiina ina patabuan to nepoon. *Mt 16:18; 1Kor 3:11; 2Kor 6:16*

22 Tovenen yam paam, yamŋa tamtoghon tisob to tineep tunja ila to Kisi ne, Kisi ighamgham uraat payam, ve iluplup gham. Leso anim Maaron Avuvu ina to nepoon. *1Pe 2:5*

3

Paulus le uraat pa ivotia ngar yongaan to Maaron pa ndug ndug to Yuda maau

1 Pughu tonene to you Paulus naghaze naghur gham ila sunuun tiou. You mbesoona to Yesu Kisi,

ve naghamgham uraat pa ulaan yam tamtoghon to Yuda maau. Tauto tighur ghou naneep ila ruum to yabyabuun lolo. *Ep 4:1; Pil 1:7; Kol 4:3*

² Yam avaat aloon varug wa. Maaron ighur uraat inim nimag ighaze nauul gham, lesa awatag ataam to ye ipatoon poia toni pait ve igham mulin ghiit. *Mban 9:15; Ga 2:7*

³ Ataam tonene, muun iyoon. Eemoghon Maaron ivotia payou ve naghazoon pani wa. Ngar pida, to nasavia ila rau tiou wa.

⁴ Ighaze awaat rau tonene, nene pale aghilaal aghaze uraat to Krisi ngara, you naghazoon pani. Ngar tonowen, muun iyoon. Ve aazne, Maaron ivotia ighazoon wa.

⁵ To muun ve inim, Maaron ivotia ngar tonenen pa iit tamtoghon maau. Eemoghon aazne, ila uraat to tau Avuvu, ye ivotia ngar tonenen pa yes mbanoonja toni patabuanja ve yes propeta pida, le ivot ighazoon.

⁶ Ngar yongaan tonenen, nene vene: Yam to Yuda maau, varu poia inim ataam payam, ve anim Krisi le ve aneep ila toni. Tauto aazne, yamja yes Yuda anim lupuun ee moghon, ve yamja izamim pa ghamuun nepoon poia ila to Maaron itaghon saveen mbuaan toni. *Ga 3:14,28+; Ep 2:14+*

⁷ You, Maaron igham poian ghou itaghon tau lolo ve poia toni, ve tapiri igham uraat payou, tauto nanim mbesoonja toni, ve leg uraat pa navotia varu poia tonene pa tamtoghon. *Ro 1:5; Kol 1:23+*

⁸ Onoon, you poiag maau. Ngar samia to muun naghamghami, nene igham ghou naneep muri kat pa Maaron tamtoghon toni tisob. Eemoghon

Maaron igham poian ghou kat itaghon tau lolo ve poia toni, ve ighur uraat inim nimag ighaze navotia Krisi varu pa ndug ndug to Yuda maau ne. Leso tiwatag Krisi tapiri toman ngar popoia naol to tineep toni, ve mbef popoiadi to ye ighaze igham di pait. Mbef tonowen, ighaze tagham ngar padi, nene pale ngar toit iraua maau. *1Kor 15:9+; 1Tim 1:13+*

⁹ Maaron ighur mbef tisob tivot. Muun ve inim, ye ivotia ngar toni ighazonj maau. Ineep to tau moghon. Eemoghon aazne, ye ivotia ighazonj wa. Ve ighaze you napaghazonjan tamtoghon pani, lesa tisob tiwatag ataam to ye igham ngar toni yongaaj tonenen anoja ivot. *Ro 16:25+*

¹⁰ Maaron igham tovene, lesa yes ajela toman mbef ariajadi pida to tineep izi sambam ve tighamgham pooz ne, matadi inim pa iit tamtoghon to taneep ila lupuun to Krisi ne, ve tighilaal ngar popoia naol naol to tineep to Maaron. *1Pe 1:12*

¹¹ Mbef naol tonene titaghon Maaron tau ngar toni to ineep muun kat ve inim, sawa to sambam ve taan tivot sone. Ve aazne, Tiina toit Yesu Krisi igham anoja ivot wa.

¹² Tovenen iit to taghur ila to Krisi ve taneep tunja ila toni, irau tala tagharau Maaron ve tasavsaav tomani. Tamatughez malep. Pasa, iit tawatag: Mbef eta ipoon ghiit pani muul maau. *Yo 14:6; Ro 5:2; Ep 2:18; Hib 10:19*

¹³ Tovenen onoon, uraat to you naghama payam, tauto inim pughu payou ve aazne nambaad patanjani. Eemoghon naghaze napalot gham tovene: Patanjani to nambaada ne, igham gham

lolomim ipataŋan ve itatan gham malep. Ayoon ariana, ve tinimim iza. Pasa, uraat tiou tonene pale inim ataam payam pa aneep toman Maaron ila ŋguruba lolo. *Pil 1:12+; Kol 1:24*

Sunŋuun to Paulus

¹⁴ Tovenen Tamaan Maaron igham ŋgar popoia naol pait. Tauto naput agheg pani ve naghaze naghur gham ila sunŋuun tiou.

¹⁵ Maaron, ye inim pughu pa mbep tisob to sambam ve taan. Ve ye inim tamandi, ve yes tisob tigham izadi ila toni.

¹⁶ Ye iza tiina kat pasa, ye iraua kat pa tapiri, ŋgar, ve mbep popoia to naol ne. You naghasoni naghaze igham Avuvu Patabuan inep tunja ila lolomim, ve ipariaan gham pa tau tapiri, leso ayoon ariana. *1Kor 16:13; Ep 6:10; Kol 1:11*

¹⁷ Ve naghaze ye igham gham aghur ila to Krisi kat, ve Krisi inep tunja ila lolomim. Ve akis ŋgar to lolood pa Maaron ve tamtoghon ariana inimale ai waria ikor taan, ve ayoon ila ŋgar tonenen. *Yo 14:23; Kol 1:23, 2:7*

¹⁸ Maaron igham gham yamŋa ival tiina anim tamtoghon toni patabuan wa. You naghaze yam asob aghilaal aghaze Krisi lolo inep toit kat. Ŋgar toni tonowen, tiina le tiina kat. Pale taghuri iza to sa? Pasa, ila le ila mala kat, ve izala le izala sala kat, ve izila le izila kat. *Mbo 103:11; Kol 2:2+*

¹⁹ You naghaze le Maaron igham gham awatag katin ŋgar to Krisi to ye lolo pait kat. Eemoghon pale araua maau. Pasa, ŋgar toni tonenen ilib pa iit tamtoghon ŋgar toit. Ighaze Maaron igham mbep naol tonenen ivot payam, nene pale ipavonin

gham pa tapiri ve ngar toni popoia to naol ne le tivon kat ila lolomim. *Kol 2:10*

²⁰ Maaron tapiri to aazne ighamgham uraat ila lolood, nene tiina le tiina kat. Tovenen sa mbeb to ighaze taghason pani, ma mataad ingali, nene ye irau igham pait. Ve tonene moghon maau. Mbeb katindi to iit tagham ngar padi maau ne paam, ye irau igham di. Pasa, mbeb eta irau ila muri maau.

²¹ Tovenen iit to taneep tunjia ila to Krisi ve taneep ila lupuuŋ toni ne, iit irau tapait Maaron iza pa tapiri ve poia toni irau sawa isob. To aazne, ve itaghoni taghoni gha ila. Onoon.

4

Mbeb pida to ilup Krisi tamtoghon toni tinim ee moghon

¹ You naneep ila ruum to yabyabuŋ lolo pasa, nanim Tiina toit Yesu le, ve naghamgham uraat toni. You naghaze napalot gham tovene: Maaron igham poian gham, ve ipoi gham anim le wa. Tovenen laghoŋ tiam, yam irau ataghon ngar poia to denjia pa poiŋ toni tonenen. Ataghon ngar tovene: *Ep 3:1; Pil 1:27; 1Tes 2:12*

² Apait taumim izamim malep. Sawa isob, yam atatan izamim izila kat, ve ataghon ngar luuma. Ve ighaze tamtoghon tigham samin gham, yam ayati malep. Ambaada moghon, ve aghur lolomim padi ve agham poian di. *Ga 5:22+; Kol 3:12+; 1Tes 5:14*

³ Iit tamtoghon to Krisi, Maaron Avuvu ilup ghiit tanim ee moghon wa. Tovenen yam irau azuaria gham pa ngar luuma. Pasa, ngar tonenen to ikis lupuuŋ to Krisi, leso tavalag ghiit sob, ve taneep pooi. *Kol 3:14+*

4-6 Aghita. Lupuun ee moghon to Krisi to inepneep. Nene iit tamtoghon toni to tanim Krisi anoja. Ve Maaron Avuvu ee moghon to inepneep. Ve sawa to Maaron ipoi gham anim le, ye ipoi gham pa aghur matamim pa mbef ee moghon.*
 Ve Tiina toit ee moghon, ghurla toit ee moghon, ghamuun ya toit ee moghon, ve Tamaan ee moghon. Nene Maaron. Mbef tisob tineep ila ye samba ve tigham uraat titaghon ngar toni. Ve ye ineep ila mbef tisob lolodi. *Ro 11:36, 12:5; 1Kor 8:6, 12:13; Kol 1:5*

Maaron irei uraat naol naol irau iit enjaena

7 Krisi igham poian ghiit, ve irei tapiri tiina ve ngar popoia naol irau iit enjaena. *Ro 12:6; 1Kor 12:4+*

8 Saveena ineep pataghaan wa. Ighaze:

“Ye iparab le ilib pa koia. Ve sawa to izala sala, ighereb ival tiina to ye iyou di tinim le, ve yesna tila, ve irei mbef popoia pa tamtoghon.” *Mbo 68:18; Kol 2:15*

9 Saveen to ighaze ye izala sala, nene pughu tovene: Ye izala moghon maau. Papazogi ye izi inim taan, ve imaat gha izila kat mateena ndug tadi. Ve imundig muul, tauto izala.

10 Tovenen ngeu to izi inim taan, tauto imuul iza ila pa sambam to ineep sala le sala kat. Leso ineep irau ndug to naol ne, ve ingin mbef tisob. *Mbanj 1:9; Ep 1:20+; Hib 4:14*

11 Krisi ighur uraat naol naol tinim nimaad, lesa tapalot lupuun toni. Tamtoghon pida tinim

* **4:4-6:** Iit Kristen taghurghur mataad pa sawa to itinja Krisi talup ghiit izi ndug sambam, ve taneep ila yesuru Tama Maaron ngurubadi.

mbaroona toni, pida tinim propet, ve pida tivovotia varu poia pa yes to tighur ila maau. Ve pida ledi uraat pa nginiin lupuuŋ to Kriŋi, ve tipatoot tamtoŋhon pa Maaron aliŋa. *Ro 12:6+; 1Kor*

12:27+

¹² Kriŋi ighur uraat tovene inim nimaad, leso tapalot Maaron tamtoŋhon toni, ve anadi timbees pooi pa Maaron ve tamtoŋhon paam, ve tiuul lupuuŋ to Kriŋi le ivot kat itaŋhon nŋar toni.

¹³ Iit irau taghamŋham tovene, le ghurla toit iyaryaŋ ve tawatag katin Maaron Natu. Leso lupuuŋ toit ee moghon, ve nŋar toit imatu, ve tataghon suvun nŋar to Yesu Kriŋi. *2Kor 3:18; Kol 1:28, 2:2*

¹⁴ Tovenen iit tataghon nŋar to ndipain muul malep. Pasa, ndipain tikis Maaron aliŋa tunŋia maau. Yes tinimale waan to yaghur ve dibom iwatokini ila inim. Ighaze ndiran to tiraua kat pa ghamuuŋ kaarom, tinim ve tiŋgal di pa saveeŋ, nene pale rikia moghon tighur ila saveeŋ kaarom todi, ve tipul ataam to Maaron. *1Kor 14:20; Yems 1:6*

¹⁵⁻¹⁶ Eemoghon iit tagham tovene malep. Iit irau lolood pa tamtoŋhon ve tagham poian di, ve tasavia saveeŋ onoon moghon padi. Ve tazuaria ghiit le tataghon katin nŋar isob to Kriŋi, ve taneep tunŋia ila toni. Pasa, ye to inim daba pait, ve iit to taneep ila lupuuŋ toni ne, tanimale ye anoŋa pida pida. Ye ilup ghiit tanim ee moghon, ve ikis ghiit tunŋia, leso tagham uraat toit toit. Ve uraata toni, to tinim senŋaŋa, ve tilup anoŋa pida pida tonowen ve tikis di tinim ee moghon, ve tipapalot di. Ighaze lolood pa tauud, ve iit enjaeŋa tagham katin uraat

toit toit, nene pale lupuun̄ to Krisi ivot inim tiina,
ve iyaryaən̄. *Ep 1:22; Kol 1:18, 2:19*

Tataghon ngar paghu to Krisi

¹⁷⁻¹⁸ Tovenen you nasaav ariana payam ila Maaron iza: Yes to tiwatag Maaron maau, yam ataghon ngar todi muul malep. Pasa, ngar todi le anona poia eta maau. Ngar todi iyaryaən̄ tighaze tizoor Maaron aliņa ve titaghon ngar to ndoroom. Tauto ighamun ngar todi, le tineep sagan pa nepoon̄ poia to iit taghami ila to Maaron. *Ro 1:21; Ep 2:12; 1Pe 4:3*

¹⁹ Matadi samia tinimale ngavuun. Ve mayadi rita maau. Tila pa naghodi moghon. Sa ngar to ulidi to matadi ingali, nene tighami moghon. Tauto tighamgham ngar samsamia naol to tingalaən̄ ila Maaron mata maau. *Ro 1:24; Kol 3:5; 1Tes 4:5*

²⁰ Laak, sawa to yam aghur ila to Krisi, ve tipa-toot gham pa ataam toni, tisaav payam pa ataghon ngar tovene? Maau kat!

²¹ You nawatag: Yam aloon̄ Yesu varu, ve tipa-toot gham pa saveen̄ onoon to ineep toni, le agha-zoon̄ pani.

²² Yes tisaav payam tovene: Nepoon̄ tiam to muun̄, lolomim ipazaagh gham pa ngar kaarom ve ngar samsamia naol. Eemoghon aazne, yam irau aghur murimim pa ngar muņgina tonanan inimale nonogiņa to aghita isami ve apiyaava ilale. Ataghoni muul malep. Pasa, ngar tovene pale iwaghamun gham. *Kol 3:7+; Hib 12:1; 1Pe 2:1*

²³ Ve tisaav payam tighaze yam irau apul Maaron itoor ngar tiam toman lolomim inim paghu. *Yo 3:3; Ro 12:2*

²⁴ Maaron ighaze igham ngar tiam inim paghu kat, leso ataghon saveen onoon, ve ngar tiam denja ve patabuan inimale ye tau. Tovenen yam irau agham ngar paghu ila toni, inimale andud gham pa nonogiija paghu. *Ro 6:4; 2Kor 5:17; Kol 3:10*

²⁵ Tovenen, yam asob apul ngar to ghamuun kaarom ineep, ve asavia saveen onoon moghon pa taumim. Pasa, iit tanimale Krisi anonja pida pida, ve ye ilup ghiit tanim ee moghon wa. *Sek 8:16; Kol 3:8+*

²⁶ Ighaze atemim yabyab, ghoru apatum gham. Pa vene, agham sosor. Tovenen agharaat lolomim le isob, ghoru ndag izila. *Mbo 37:8; Mt 5:22+; Yems 1:19+*

²⁷ Aghur soso pa Ngeu Samia malep. *Ep 6:11; Yems 4:7; 1Pe 5:9*

²⁸ Ve yes yubyubja tiyub iraua. Yes irau timundig ve tigham uraat popoia pida pa taudi nimadi. Leso tigham ledi mbep ve tiuul yes mbo-laaja. *Igham 20:15; 1Tes 4:11+; 2Tes 3:8+*

²⁹ Ve saveen samia eta ivot ila avomim malep. Asavia saveen popoia moghon to irau iuul tam-toghon, ve ipatoot di pa sa ngar to yes tikankan pani. Leso saveen tiam inim ataam pa poia to Maaron iza todi. *Ep 5:4; Kol 3:8, 4:6*

³⁰ Ve agham Avuvu Patabuan to Maaron lolo ipatanan malep. Pasa, ye to inim ghilaloon payam ighaze yam anim Maaron le wa. Ighaze ye ineep ila lolomim, yam awatag: Sawa to Krisi imuul inim, ye pale igham mulin gham, ve aneep pooli. *2Kor 1:22; Ep 1:13+; 1Tes 5:19*

³¹ Tovenen ngar to njuuaan, ateed yabyab, kisiin malmaliin toit, kokaan, bobaan soroksorok, ngaliin saveen, ve piyavoon saveen velegiin, toman ngar samsamia pida paam, inep tiam malep. Apul di tisob tineepledi.

³² Ve agham poian taumim, lolomim isamin nditamim, ve awagharaton lolomim ve apul sosor to nditamim, inimale Maaron ireu sosor tiam ila uraat to Yesu Krisi. *Mt 6:14; Kol 3:13*

5

¹⁻² Maaron lolo payam kat, ve igham gham anim ye tau ndinatu. Tovenen laghoon tiam, yam irau ataghon ngar toni, ve lolomim pa tamtoghon tisob ve agham poian di, inimale Krisi lolo pait ve ipul tau imaat pait. Ngar to ye ighami, nene igham Maaron lolo poia inimale watoonrau to vuzi poia kat. *Mt 5:48; Yo 13:34; 1Pe 1:15+; 1Yo 3:16*

Taneep sagan pa ngar samsamia

³ Ngar to ghuruun maat, ngar to mataad samia inimale ngavuun, ve ngar to mataad mbeb, yam aneep sagan pani. Ngar tovene ivot ila lolomim malep, ve asavia rita malep. Pasa, yam anim Maaron tamtoghon toni patabuanja wa. Ighaze agham ngar tovene, nene denja maau. *1Kor 6:18+; Ga 5:19; Kol 3:5; 1Tes 4:3*

⁴ Ve saveen samia eta ivot ila avomim malep. Tovenen asavia kombol malep, ayau avomim pa saveen soroksorok malep, ve asavia saveen samia inimale mogheraan malep. Pasa, ngar tovene, nene denja maau. Yam irau lolomim poia pa Maaron ve apaiti pa poia toni. *Ep 4:29*

⁵ Ve aloonj. Ighaze tamtoghon eta ighurghur maat, ma mata samia inimale ngavuun, ma mata mbeb, nene ye ineep iloonj ila pooz to Krisi maau, ve iza pa ghamuunj nepoonj poia izi Maaron ndug toni maau. Pasa, ngar tovene, nene inimale tambees pa maaron kaarom. *1Kor 6:9+; Syg 21:8*

⁶ Tovenen matamim imosmoos pooi pa taumim. Pa vene, tamtoghon titombaam gham pa saveenj todi sorokorok, ve tiweu gham ve agham ngar samsamia to nasavia di ne. Ve yam awatag: Yes to tizoroor Maaron, ve tinoknok ghamuunj ngar tovene, nene pale mbalmbali to Maaron iza todi. *Ro 1:18; Kol 3:6*

⁷ Tovenen yam ala toman di pa ngar todi tonowen malep. Aneep sagan padi.

Tataghon ngar to ghazoonja

⁸ Muunj, yam ataghon ngar to ndoroom. Eemoghon aazne, yam aneep tunja ila to tiina toit Yesu, ve ghazoonja toni isul gham. Tovenen laghoonj tiam, yam irau ataghon ngar to ghazoonja.

⁹ Ghazoonja to Krisi, anonja tovene: ngar popoia to naol ne, toman ngar denja, ve saveenj onoon. *Ro 13:12; 1Yo 1:7+, 2:9+*

¹⁰ Ve atoova pa aghilaal ngar to igham Maaron lolo poia. *Ro 12:2*

¹¹⁻¹² Ngar to ndoroom, nene le anonja poia eta maau. Tovenen yam aneep sagan pani. Ngar tovene, yam avotia ivot ighazoonj, leso tamtoghon tighilaala ve tipuli. Pasa, ngar to tighamghami inim ngozaan, nene samia kat. Ighaze tasavia, nene pale mayaad. *Mt 18:15; 1Kor 5:9+; 2Kor 6:14*

¹³ Eemoghon ghazooᅇa to Krisi igham mbeb tisob tivot tighazooᅇ. *Yo 3:20+*

¹⁴ Ve ghazooᅇa toni isul di ve itoor di. Leso anadi tipatooᅇ ghazooᅇa toni. Pughu tonene to tisavsaaᅇ tighaze:

“Yom to ugheen, umundig pa mateeᅇ. Leso ghazooᅇa to Krisi isul ghom.” *Ro 13:11*

Ngar to yes to titaghon pooz to Avuvu Patabuan

¹⁵ Tovenen matamim pa laghoonᅇ tiam pooi. Yes to tikankan pa Maaron ᅇgar toni, yam ataghon di malep. Yam irau aneep animale yes to tiwatag Maaron ᅇgar toni.

¹⁶ Ighaze yam irau agham ᅇgar poia eta, ghoroghami pataghaanᅇ. Pasa aazne, taneep ila sawa samia. Tovenen takankan pa muri. Pale irau aghami, ma maau?

¹⁷ Tovenen agham ᅇgar to borouᅇa malep. Azuaria gham le aghazooᅇ pa ᅇgar to Maaron lolopani. *Ro 12:2*

¹⁸ Ve aghun ya arianaᅇ le asami malep. Pa vene, agham ᅇgar to iwaghamun taumim. Yam irau apul Avuvu Patabuanᅇ ipavonin gham pa ᅇgar toni ve tapiri, ve igham pooz payam. *Lu 21:34; Ro 13:13*

¹⁹ Sawa to alup gham, asavia mbouᅇ to yes Israela, ve ambou mbouᅇ to sunᅇuᅇ, toman mbouᅇ pida to Maaron Avuvu igham di payam ne paam. Leso apait Maaron iza, ve apariaanᅇ taumim paam. Yam irau ambou toman lolomim ve apait Tiina toit Yesu. *Kol 3:16*

²⁰ Ve sa mbeb to ighaze ivot payam, poia payam ma ipatanᅇan payam, nene lolomim poia pa Tamaan Maaron, ve apaiti ila Tiina toit Yesu

Krisi iza irau sawa isob. *Kol 3:17; 1Tes 5:18; Hib 13:15*

²¹ Yam aroron pa Tiina toit Yesu Krisi, ve aghaze ataghon ngar toni. Tovenen atatan taumim ve aneep ila nditamim sambadi. *1Pe 5:5*

Saveeņ injarua yes vaivaiņa

²² Tovenen yam ndiliva, aneep ila ndizwamim sambadi ve ataghon ngar todi, inimale aneep ila Krisi samba ve ataghon ngar toni. *Mbnp 3:16; Kol 3:18; 1Pe 3:1+*

²³ Pasa ndizwamim nditamoot, yes tinim daba payam, ve tigham pooz payam, inimale Krisi inim daba pa lupuuņ toni, ve ighamgham pooz padi. Lupuuņ toni, nene inimale ye tau anoņa. Ve ye ipul tau imaat padi, tauto igham mulin di, ve tineep pooi. *1Kor 11:3; Ep 1:22+; Kol 1:18*

²⁴ Tovenen yam ndiliva aneep ila ndizwamim sambadi ve ataghon ngar todi pa mbeb tisob, raraate inimale lupuuņ to Krisi tineep ila ye samba ve titaghon ngar toni.

²⁵⁻²⁶ Ve yam nditamoot, lolomim pa ndizwamim kat ve agham poian di, inimale Krisi lolo pa iit tamtoghon to taneep ila lupuuņ toni, ve ipul tau imaat pait, ve irughuuz ghiit pa ya toman saveeņ toni. Leso tangalaan ila Maaron mata ve tanim tamtoghon toni patabuanņa. *Yo 15:3; Kol 3:19; 1Pe 3:7*

²⁷ Pasa, Krisi ighaze lupuuņ toni ivot kat [inimale liva to ighaze ivai ve igharaat tau le paghuna kat.] Leso sawa to Mboņ Muri, ye igham iit tamtoghon to taneep ila lupuuņ toni ne, ve itiņa talup ghiit tanim ee moghon, ve iit popoiaad ila ye mata. Leed sosor eta maau, ve ngar samia eta ineep toit

muul maau, ve tataghon ngar patabuan moghon.
2Kor 11:2; Kol 1:22; Tit 3:5; Hib 10:22

²⁸ Tovenen yam nditamoot irau ataghon Krihi ngar toni tonowen paam, ve lolomim pa ndizwamim ve agham poian di, inimale lolomim pa taumim anonamim. Ngeu to ighaze lolo pa azuwa ve igham poiani, nene lolo pa tau ve iuul tau paam.

²⁹ Aghita. Tamtoghon eta ighur koi pa tau anona maau. Iit tasob mataad pa anonad ve tangini pooi. Krihi itaghon ngar raraate moghon pa iit tamtoghon to taneep ila lupuan toni.

³⁰ Pasa, iit tanimale ye tau anona pida pida. *Ro 12:5; 1Kor 12:27*

³¹ Saveen to Maaron ineep pataghaan tovene:

“Pughu tonene to tamoot eta ighaze ivai, ye irau ipul tama ve tina, ve yesuru azuwa tilup di tinim ee moghon.” *Mbnp 2:24; Mt 19:5*

³² Saveen tonene, ngara tiina, ve pughu yongan ineep ila. Nene nasavia vaiuan ngara pida to injarua Krihi ve lupuan toni. *Syg 19:7*

³³ Eemoghon saveen tonene injarua ghiit paam. Tovenen yam nditamoot asob lolomim pa ndizwamim ve agham poian di, inimale lolomim pa taumim. Ve yam ndiliva atandag pa ndizwamim, ve apakur di.

6

Saveen injarua yes ndipain toman nditamandi ve nditinandi

¹ Yo, yam ndipain anim Tiina toit le wa. Tovenen aloon nditamamim ve nditinamim aliñadi. Pasa, ngar tonene denja ila ye mata. *Kol 3:20+*

²⁻³ Aloon Maaron aliña tonene:

“Matam lonlonaiña pa tamam ve tinam, ve utandag padi.” *Igham 20:12; Mt 15:4*

Tutuun tonene, nene tutuun inim mata to saveen mbuaan ineep ila. Saveen tovene:

“Leso uneep pooi ve uneep mala izi taan.”

⁴ Ve yam nditamandi, awaghamun ndinatumim lolodi malep. Pa vene, agham di atedi yabyab sorok. Yam irau angin di pooi, ve apasalungan di toman saveen luuma. Leso ataghon ataam to Tiina toit. *Lo 6:7; Np 22:6*

Saveen inarua yes mbesoña sorok ve daba todi

⁵ Yam mbesoña, aloon daba tiam aliñadi ve atandag padi, ve ambees padi pooi toman lolomim, raraate inimale ambesmbees pa Krisi. *Kol 3:22; 1Tim 6:1; Tit 2:9+; 1Pe 2:18*

⁶ Agham kaarom pa uraat malep. Mbesoña pida, ighaze daba todi tineep ve tighita di pa uraat todi, nene pale tigham katin uraat, lesa tigham di lolodi poia. Ve sawa to daba todi tipul di ve tila, ghoru tigham poian uraat maau. Yam agham tovene malep. Pasa, yam mbesoña to Krisi. Tovenen yam irau agham uraat tiam toman lolomim. Leso ataghon Maaron ngar toni.

⁷ Tovenen tinimim imbees pa uraat tiam ve aghami toman lolomim poia. Pasa, yam agham uraat pa tamtoghon moghon maau. Yam agham uraat tonanan pa Tiina toit Yesu paam.

⁸ Ve yam awatag: Sa uraat poia to ighaze iit taghami, nene pale Maaron igham atia poia pait itaghon uraat to iit enaenja. Ye pale igham tovene pa tamtoghon tisob. Yes mbesoonja, ve yes to mbesoonja maau ve tinjin taudi ne paam. *Mt 25:34+; 2Kor 5:10*

⁹ Ve yam daba paam, apatoonj njar to Krisi pa mbesoonja tiam. Apamatughezan di sorok malep. Pasa, yam awatag: Yamnja mbesoonja tiam lemim daba ee moghon. Ye Tiina tiam to ineep izi sambam. Ve ye igham njar pa tamtoghon izadi maau, ve ivool to tamtoghon eta maau. Ye itaghon njar ee moghon pa tamtoghon tisob. *Ro 2:11; Kol 4:1*

Mbeb to malmal to Maaron igham pait

¹⁰ You naghaze nasavia saveen tiou tonene, ve isob. Yam irau agham tapirimim ila to Tiina toit. Pasa, ye ariana, ve tapiri tiina kat. *1Kor 16:13; 2Tim 2:1*

¹¹ Ve yam irau agharaat gham pa mburuguunj tisob to malmal to Maaron igham di pait. Leso sawa to ighaze Ngeu Samia itoov gham, ma itombaan gham, yam pale ayoon tunja. *Ro 13:12+; 2 Kor 10:4*

¹² Pasa, yam awatag. Itinja tamtoghon to taan taparab maau. Aazne, mbeb samsamia naol to tapiridi ve izadi tintina, tinim koiaadnja ve taparab toman di. Mbeb tonowen tineep ila inadi to sala we, ve tighamgham pooz toman tapiridi, lesa tipalot njar to ndoroom izi taan. *Ep 2:2; 1Pe 5:8+*

¹³ Tovenen yam irau agharaat gham, ve aghur mbeb tisob to malmal to Maaron igham di pait. Leso sawa to ighaze tovaan samia ivot payam, yam pale ayoon tunja, ve aparab ariana ve alib pa

tovaan tonenen. Ataam to ayoon tunja, nene vene:
2Kor 6:7, 10:4

¹⁴ Yam irau akis saveen onoon, ve ataghoni toman lolomim. Pasa, nene inim puus pa apus nonogiina tiam.*

Ve yam irau ataghon ngar denja. Pasa, nene inimale mbef ariana to ipoon atemim pa ndaab. *1Tes 5:8*

¹⁵ Ve varu poia to isavia ataam to itina Maaron ve tamtohton talup ghiit tanim ee moghon, yam irau agharaat gham pa votiaani irau sawa isob. Pasa, ngar tovene pale ipalot gham inimale andud duduuna to aghemim ve alaagh. *Is 52:7; Ro 10:15*

¹⁶ Tovenen yam ataghon ngar naol tonenen, ve akis ghurla tiam ariana. Pasa, ghurla tiam, nene inimale sigeu to ipoon gham pa pane ndinatu tisob to Ngeu Samia to yab ighanghan ila matadi.

¹⁷ Ve uraat to Yesu Krisi to igham mulin ghiit, nene aghami inim lemim. Pasa, nene inimale hat ariana to ipoon dabamim pa ndaab. Ve saveen to Maaron to Avuvu Patabuan igham pait, nene yam akisi inim lemim buza. *1Tes 5:8; Hib 4:12; Syg 19:15*

¹⁸ Ve asun itaghon pooz to Avuvu Patabuan irau sawa isob. Aghason Maaron pa iuul gham pa mbef to naol ne. Ve tinimim imum pa sunuun malep. Apamaat ariana, ve aghur Maaron tamtohton toni patabuana tisob tila sunuun tiam. *Lu 18:1; Kol 4:2; 1Tes 5:17*

¹⁹ Ve matamim ingal ghou ila sunuun tiam paam. Aghason Maaron pa ipalot ghou ve igham pooz

* **6:14:** Sawa to yes ndaaba to Rom tila pa malmal, tiput nonogiina todi iza, ve tipusi pa puus. Leso tilaan kat.

pa saveeñ tiou. Leso sawa to navotia mos toni pa tamtoghon, namatughez sob, ve napaghazonan di kat pa varu poia to muuñ iyoon ve aazne ivot ighazon.

Ro 15:30+; Kol 4:3; 2Tes 3:1

²⁰ You naghram Tiina to it avo, ve navovotia saveeñ toni pa tamtoghon. Tauto tighur ghou naneep ila ruum to yabyabuun lolo, ve tikau ghou pa sen. Tovenen yam lolomim imaagh payou malep. Aghur ghou ila sunuun tiam. Leso namatughez sob, ve nayoon ariana, ve navotia katin varu poia itaghon Maaron ngar toni. *Mban 28:20; 2Kor 5:20*

Paulus ipasob saveeñ toni

²¹⁻²² Tonvetaz to it Tikikus, ye mbesoona poia eez to Tiina to it Yesu Krisi, ve lolog pani kat. You nambaana ilat, lesu ipaes payam pooi pa nepoon tiei ve uraat tiei, ve ipalot gham pa saveeñ pida paam.

Mban 20:4; Kol 4:7+

²³ Yam tonvetaz, Tamaan Maaron yesuru Tiina to it Yesu Krisi pale tingin gham asob aneep pooi, ve luuma to di iza tiam. Ve tipalot gham, lesu lolomim pa tamtoghon ve agham poian di, ve aghur ila ariana.

²⁴ Tamtoghon tisob to lolodi ikis Tiina to it Yesu Krisi ariana, poia toni iza to di itaghoni taghoni gha ila. Onoon.

Maaron Saveen Toni Patabuan
The New Testament and portions of the Old Testament
in the Oov Dialect of the Saveeng language of Papua
New Guinea. The Saveeng language is also called Mutu
or Mutu-Tuam.

Sampela hap Buk Baibel long tokples Saveeng Oov
long Niugini

copyright © 2011 Wycliffe Bible Translators, Inc.

Language: Saveeng (Mutu)

Dialect: Oov

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-24

PDF generated using Haiola and XeLaTeX on 18 Apr 2025 from source files dated 31 Aug 2023

c7a45d99-91a2-564f-9c55-d2efc8be7fae